



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim

tiryimyim@aolima

tir yimyim

TAPAK 8

**Centre ordinance anema TMC-i
nokdaksü: Mamata**

**Neeraj Chopra world number 1
asayar kümogo**



VOL. XX NO. 221 (ADOK 221)

DIMAPUR RASEMNÜ (WEDNESDAY)

MONUPII (MAY) 24, 2023

₹ 5.00

Minister Paiwang-i Union FM den ajurutep



Dimapur, May 23, 2023 (TYO): Health & Family Welfare Minister P. Paiwang Konyak-i May 23, 2023 nü Delhi nung Union Finance Minister Nirmala Sitharaman den ajurutepa Nagaland atema maneni teyari balala meshiogo.

Minister Paiwang-i Nirmala dang Nagaland indang health system renloka aruba aser taawa kanga tashi itta akümba osang lemsatop.

"Nüboritemi nungdakba ama health system tajungba akümer saka imlaba ama matong lir. Iba wadang nung tayongzükba jenti lir aser itemji health infrastructure majungba, staff atema housing maliba, nübo peria maliba, senzusenbongsü aser gari lenmang majungba khurettem lir" ta Paiwang-isa metetdaksü.

State sorkari senso ajak nem affordable aser accessible health care agütsütsü jangrar anungji PPR ID-11761 Nagaland Health Systems Strengthening Project indang External Aided Project agizüksütsü mepishir. Iba ya Health Centres, health workers Quarters amala yanglutsü atema temulung agüja renemba lir, ta paisa Union Finance Minister dang mepishi.

Ayushman Bharat Health Infrastructure Mission (PM-ABHIM) aser India COVID-19

Emergency Response and Health System Preparedness (EGRP) kübok mapang telatet atema senotsü lemzüksüba ajanga health sectors nung nungdakba ajak mayimjem, ta Paiwang-isa ashi.

World Bank ajanga teyari agüja Nagaland Health Project takok ngua inyakogo aser state sorkarisa World Bank dang ano US\$42.74 million agüja Nagaland yaritsü shidangogo. Iba ya Nagaland nung district tasentem nung District Hospitals, staff quarters yanglutsü aser District Hospitals tashi itdaksütsü atema lir ta paisa Nirmala Sitharaman dang ashi.

National Health Mission (NHM) ajanga Nagaland nung health sectors ajungketer saka kümtem süia arudang Annual Resource Envelope indang 50% dang angur. Anungji Union Finance Minister-i instalments pezü melena instalments ana lemsar senotsü agütsütsü mepishir, ta Minister Paiwang-i ashi.

Senden nung Nirmala Sitharaman-ia Centre nungi 90% grant angutsü atema mapang shitak nung State Share agütsütsü nenshia metetdaksü.

Iba senden nung Minister Paiwang Konyak den Commissioner & Secretary, H&FW, Y. Kikheto Sema, IAS aden.

Manipur nunger 7500 tashi Mizoram nung jenoka lir

Aizawl, May 23, 2023 (Agencies): Manipur nungi nisung 7500 shi ka Mizoram nung jenoka lir ta ketdangsur kati ashi.

Manipur nung Kuki ta ajaba Zo nunger 7,527 tashi Mizoram nung arua lir, ta pai ashi.

Parnok ya Mizoram kübok district 8 nung jenoka lir. Kolasib nung nisung teimtiba (2,685) jenoka lir aser iba sülen Aizawl nung 2,386 aser Saitual nung 2,153 jenoka lir.

"Mizo National Front (MNF) tenzükertemi alizung aika ayuba rongnung India nung Zo nunger ajak ka kuma longjemtsü aser governmental authority ka kübok anioktsüba lir" ta Mizoram Chief Minister Zoramthanga-i ashi.

Manipur nung Kuki MLA 10-i state Manipur nung tenemlen aliba tesem ajak asoshi sorkar

balaka meshia akhangba sülen Zoramthanga-i iba osang metetdakja liasü.

MNF indang takhangba rongnung kaji Mizoram meketa Zo nunger aliba state tem nungi "Greater Mizoram" ta ser single administrative body ka tentetsüba liasü, ta Zoramthanga-i osangbener dang ashi.

"Centre den yimjung olemtep alidang iba onük ya benoka jembiogo aser Constitution nung Arrla 3 kübok iba mapa ya inyaktetsü" ta paisa ashi.

Ajisüaka Manipur state sasep indang onük nung Mizoram-i tebang aitsü makok. Iba mapa ya Manipur nung asen adianutemi inyaktetsüba kechiyong Chin-Kuki-Mizo-Hmar-Zomo kintem longjemtsüla, ta CM Zoramthanga-isa metetdaksü.

Manipur nung Kuki nungeri "Solution First, Peace Next" akhanger

Imphal, May 23, 2023 (Agencies): May 23 nü Kuki nunger meyirjang aika adenshir Centre sorkar dang "Solution first, Peace next" takhangba agütsüogo.

Kangpokpi district kübok Champhai Sub Division nung Kuki nunger lungkak aiterem adenshia iba takhangba agütsü.

United People's Front (UPF) aser Kuki National Organization (KNO) teloktemi India sorkar aser Manipur sorkar den yimtenren olemtep nung ajemdaker latetsüla ta parnokisa metetdaksü.

Sorkari Kuki nunger khuret

agizükba lemtet ka magi tashi sorkari yimjung atema inyakba mapa kecha magizüksü ta Kuki nungerisa ashi.

Sorkari Kuki nunger timtemba aser khurettem asoshi mebilemstüi yimjung nung temulung agütsüba atema mepelar, ta Committee on Tribals Unity, Sadar Hills-i osangbener dang ashi.

Kangpokpi district kübok relief camps balala nung nisungtem jenoka lir aser parnok chiyungtsü, süoshi, medical facilities aser tang nungdakbatem peria mangur, ta Committee on Tribals Unity zungsem kati ashi.

Pei ki toktür jena arur kati osangbener dang ashiba agi Centre sorkari onok indang khurettem agientsü mapa inyakra pa kija akoksatem bendanga agütsütsü.

Ano Bongbal Khullen nungi jena arur tantsür kati commandos aser Meitei nungeri yimtsungtem rondoktsüba aser osetsüset auya bener aoba osang lemsatop.

Kuki nungerisa May 24 nü Saparmeina nung mener lungkak aitba sentong ka agitsü renema lir. Parnoki Centre sorkar dang Kuki nunger yaritsü mepishia lungkak aittsü.

MCCI-i Mokokchung nung hawkers azüoktsü ayongzükter

Dimapur, May 23, 2023 (TYO): Mokokchung Municipal Council (MMC) ajanga agütsüba 'temporary' permits bener hawkers-i Mokokchung jila nung yokyayokjia senzüba atema tebilemstü abener ta Mokokchung Chamber of Commerce & Industry (MMCI)-i ashi.

MMCI-i aiben bangdakpur dang 'temporary' permit indang tebilemstü lemsatopogo saka parnoki iba ya magizükter, ta sangdong ka nung ashi.

Chichiba shishilembartemi ozüngi nungdakba fees aser taxes agütsür aser iba nung sorkar nem GST aser MMC nem sanitation tax dena lir. Ajisüaka hawkers temi 'temporary' permit agütsüba dak alaka kecha magütsür, ta MMCI-i ashi.

Item nisungtem yagi shishilembabaren nung tetsükdaksü bentsür arur aser registered traders nem timtem agütsür. Item yokyayokjia senzürtem asoshi price control

mesüra quality control kecha mali aser iba jagi mapang shia talirtem ashioktsür, ta parnokisa ashi.

Mokokchung nung 'temporary' permit aginürtem ya kong nungi aruar mejangjateter aser iba jagi parnok ya public atema lendong lir. Tarutsü nung item nisungtem ajanga public nem timtem kar danga bentsür arura 'temporary' permit agütsüba bangdak ketdangsurtemi iba tebilemstü khuretji abentsü, ta MMCI-isa metetdaksü.

Nagaland nungi nisung 4-i UPSC tatidang nung takok angu



(Abelen nungi) Yimkum Ozukum, Vevotolu Kezo, Imkongnukla Ao aser Aotula Ozukum.

Dimapur, May 23, 2023 (TYO): Nagaland nungi candidate pezü UPSC CSE 2022-23 tatidang nung takok tajung ngutetogo.

UPSC CSE 2022-23 tatidang nung takok angurtem ya Yimkum Ozukum (203), Vevotolu Kezo (387), Imkongnukla Ao (723) aser Aotula Ozukum (874) nunger lir.

Nagaland deputy chief minister Y Patton-i takok angur nem tenünsang agütsüba metetdaksüogo.

"Parnoki linük tenzükba aser temelenshi bener aruba mapa tasen inyaka aodang maparen ajak nung takok ngudakjang ta moatsür. Parnoki maneni takok ngudakjangma" ta Deputy CM Patton-i ashi.

Nagaland nungi candidate pezü rongnungi Aor par asem lir. Parnok ya Süngratsü nunger Yimkum Ozukum, Yimjenkimong tsür Imkongnukla aser Longpa tsür Aotula Ozukum nunger lir.

Union Public Service Commission (UPSC)-i May 23 anüngdang 2022 UPSC CSE tatidang indang osang metetdakja liasü.

Iba tatidang nung takok angur temaba menden pezü nung tetsür candidate tem dang lir aser tematiba 10 nung tetsür 6 lir.

Candidate 933-i Union Public Service Commission nung takok nguogo aser parnok Indian Administrative Service (180); Indian Foreign Service (38); Indian Police Service (200); and Central Services, Group 'A' (473) aser Group 'B' (131) nung shimoktsü.


September 2022 nung UPSC written exam agia liasü aser January-May 2023 tashi Personality Test indang interviews agi.

Tematiba menden pezü nung takok angurtemji Shri Ram College of Commerce, University of Delhi nungi

graduate in Economics (Hons.) Ishita Kishore; Kirorimal College, University of Delhi nungi graduate in Commerce Garima Lohia; Civil Engineering from IIT, Hyderabad nungi graduate (B Tech.) Uma Harathi N aser Miranda House College, University of Delhi nungi graduate (B Sc.) Smriti Mishra nunger lir.

Taküm takok anguba candidate nung tetsür 320 dena lir. Maneni Benchmark Disability nisung 41 dena lir aser parnokji Orthopedically Handicapped 14, Visually Challenged 7, Hearing Impaired 12 aser Multiple Disabilities nisung 8 lir.

Candidate 933 rongnung General background nungi 345, Economically Weaker Section (EWS) nungi 99, Other Backward Caste (OBC) nungi 263, Scheduled Caste (SC) nungi 154 aser Scheduled Tribe (ST) nungi 72 lir.



Lotha aser Ao oshi nung Nagaland 'The Hornbill Warrior' ta sür tanurtem kaket ka Dr. Sanjeev Chopra (IAS Retd. aser kaket zülur) aser Dr. Shashi Tharoor (Member of Parliament aser kaket zülur) nati May 16, 2023 nü New Delhi nung saya liasü. The Hornbill Warrior kaket ya otsü aser sentsü atepba kaket ka lir, koba Nagaland nungi tetsür chanu kati angatetba nung ajemdaker Nagaland indang sobaliba indang shia lir. Tesamar aliba oshi-oben wazüka ayutsü nükjidong nung INTACH indang Heritage Education and Communication division ajanga iba kaket ya ano Naga nunger oshi pongu nung meyiptsü tenzükogo.

Mokokchung nung DISHA senden amen

Dimapur, Monupii/May 23 (TYO): Mokokchung District Development Co-ordination and Monitoring Committee (DISHA) senden ka May 23, 2023 nü MP, Lok Sabha, Tokheho Yepthomi lenisüba kübok mena liasü.

Iba senden nung jembidang state nung taoba aser tang teinyakdak Elected Members temi Mokokchung nung DC Office Building tebour junga yangluba nung shilem agiba atema pelaba lemsatap, koba state nung tajungtiba rongnung

ka lir, ta ashi.

Pai district nung aliba department ajunga dang Central Scheme tem ochishia aser junga mapa kuma inyaksü ayongzük aser lokti nung tajemzükba jenjang nung aliba nüburtem ajungketsü asoshi maparen ajak shidak inyaksü ayongzük liasü.

Iba senden nung Project Director DRDA, Mokokchung; Assistant Director, Food & Civil Supplies, Mokokchung; Executive Engineer, PWD (R&B), Mokokchung; District Agriculture

Officer, Mokokchung; District Welfare Officer, Mokokchung; Superintendent Engineer (Power), Mokokchung; Chief Medical Officer, Mokokchung aser Executive Engineer PHED, Mokokchung nungi PowerPoint presentation agüja liasü.

Seden tenzük Deputy Commissioner, Mokokchung, Shashank Pratap Singh, IAS ajanga jembi aser ADC, Hq, Mokokchung, Chumlamo Humtsoe-i melepzüng o jembia liasü.

Rev. Imkongsunep-i National Grassroots Innovation Awards 2023 sempet agizük



Rev.Imkongsunep Delhi nung Award agizüker kelen pai yangluba kol anasa tangokba noksa.

Mokokchung, Monupii/May 23(TYO): Chakpa Baptist Arogo Pastor Rev.Imkongsunep-i Department Science and Technology ajanga National Innovation Foundation -India-i agutsüba 11th National Grassroots Innovation Awards 2023 khonang sempet agizükogo.

Imkongsunep-i iba award ya pongalashi menümba aser jiro teküp asaba kol purapiteta yanglutetba asoshi agizük.

Tir Yimyim-i award agizüksang Rev.Imkongsunep den pai iba kol ana yanglutetba indang metetnüa jembidang, yimtak alir asünung kidang ak 2 mesüra 3 bosa mesür aser iba nemji agutsüsa atema ponglashi lu ayimer, pongalashiji alu nungi bener adoker ibaji semki nung setsa-a anepalutsüji mapa kanga tasak asünung pongalashi menünsaba kol ya yanglutsü apitet aser 2012 küm mapang hapta 1 agia yanglutet, ibaji yangluteter kelen vedio ka yanglur medemer kar dangi yok nung aikati kanga junger ta kuli tajung lemsatap.

Paisa ashiba agiiba vedio-ji

ngua Horticulture Department nungi Officer kari pongalashi menümba kol-ji dang masu saka ano jiro teküp asaba kol-a yangludangang ta ajungshi nung ita 3 agia iba jiro teküp asaba kol-ji yanglur Horticulture Department denji jembi nung ibaji mapa mekümteti tembang.

Taoba mapang nung pongalashi menümba aser jiro teküp asaba kol yangluba vedio yanglua prokshiba ngua 2019 küm National Innovation Foundation -India nungi par ki bushia arua pa den sensakema pai yangluba kol anaji vedio tangoker oadok. Iba sülenjibo Delhi nung National Innovation Foundation -India festival Delhi nung May 10 nungi 13 tashi amongdang adentsü asoshi pai yanglua aliba kol anaji bener arutsü asoshi jaok. Anungji pai iba kol 2 den pongalashi 3 aser jiro 3 ta bener oagi iba machine nung pongalashiji menunga sayu aser jiroji teküpji sa-a sayu.

Iba festival akaba mapang nung Delhi nung aliba school aser college-tem nungi kaketshir aser shishashir aika adenshia item kol

aser tapu balala sayaba nungi tangazükba agi, aser iba mapang nungi National Innovation Foundation -India puri pa dang iba kol kaka yanglua NIF Headquarter Gujarat nung teti asoshi amshitsü agutsüsa metetdakja liasü. Festival akaba mapang nungi NIF puri pa dang item kol 2 yanglutsü asoshi sen aser oset agutsüsa pa den asüngdangtepa liasü.

Iba kol 2 ya ayok ka asünung jenjang kwi tashi agi ayoktsüta metenüa asungdangdang tang tashi ano kata meyok dang saka iba kol Anaya merang insang aser nungtakba oset aika amshia aser anogo mapang aika indoka yanglur asünung Jiro menümba kolji Rs.23,000/- jenjang asütsü aser jiro teküp asaba kolji Rs.12,000/- jenjang asütsüta lemsatap. Iba kol ana Small Scale Industry asosshi kanga dang tongtipang asütsüta paisa metetdaksü.

Arishi kum 52 tain Rev.Imkongsunep ya Yaonyimsen nunger Wb.S.Y.Nokdang aser Alemla tena jabaso lir, pa ya tang Chakpa Baptist Arogo nung sannüker teinyakdak lir. Pa kinüngtsü Wt.Achila Arong den tanur jabaso 2 lir.

Rev.Imkongsunep-i National Innovation Foundation -India, ajanga agutsüba 11th National Grassroots Innovation Awards 2023 khonang sempet ya Minister of State for Science & Technology, Jitendra Singh ket nungi Award den sen Rs.50,000/- dena agizük.

Pa iba National Innovation Foundation -India-i agutsüba 11th National Grassroots Innovation Awards 2023 sentong nung adentsü asoshi taro tao aser anenzükba ajak NIF ajanga aguja liasü.

Rev.Imkongsunep-i iba award ya Pineapple Peeling Machine ang Shredding cum Peeling Machine State Award ta nungja nung agizük.

Delhi nung NPP National Committee senden amen

Dimapur, Monupii/May 23 (TYO): National People's Party (NPP) indang National Committee Meeting May 22, 2023 nü Constitution Club of India, New Delhi nung mena liasü.

Iba senden ya NPP tir aser Meghalaya Chief Minister Dr. Conrad K. Sangma lenisüba kübok mena liasü, kong Assam, Arunachal Pradesh, Manipur, Nagaland, Mizoram, Chhattisgarh, Jharkhand, Karnataka, Gujarat aser Uttar Pradesh nungi party züngsemtem dena liasü.

Iba senden nung Meghalaya, Nagaland aser Manipur nungi tawa shimba MLA tasentem nem tetushi agutsü aser state unit balalai aruya aliba Lok Sabha Election atema renemshia aliba indang osang agüja liasü.

Iba senden nung National Treasurer, James K. Sangma, National General Secretary (Organization) aser in-charge of Arunachal Pradesh shima liasü.

James Sangma-i 2023-24 atema Annual Budget osang agütsü aser party indang audit osang agüja liasü.

Mizoram nung election agitsü aliba dak sendakba nung Meghalaya Cabinet Minister Dr. M. Ampareen Lyngdoh ya Mizoram atema state incharge shima liasü.

Kasa senden nung NPP Nagaland tir Dr. Andrew Aho to Sema nem National General Secretary I/C Frontal Organization mapa agütsü aser linük ajunga awajemtsü nunglokja liasü.

Pa melena NPP Nagaland tir inyaksü MLA Nyamnei Konyak shima liasü.

Iba senden nung Manipur tensa atema pangzüng ka renema NPP ajanga Manipur tensa majungba atema tejashi lemsatapa liasü.

Manipur nung tensa tajungba kumdahtsütsü asoshi kin ajak den lungjemer mapa inyaksü iba senden nung lemtet.

Medziphema Town Council office tasenba semzükogo



Advisor, Urban Development and Municipal Affairs Dept., Nagaland, Zhaleo Rio, IAS (Retd.) ajanga May 23, 2023 nü Medziphema City Centre nung Medziphema Town Council office tasenba semzüksüdag tangokba noksa nung angur.

Dimapur, Monupii/May 23 (TYO): Medziphema Town Council (MTC) indang office tasenba May 23, 2023 nü Medziphema City Centre nung Advisor, Urban Development & Municipal Affairs Department, Nagaland, Zhaleo Rio, IAS (Retd.) ajanga semzükja liasü.

Iba ki semzüksüba sentong nung tetushi tesemdang ka ama jembidang, City Centre ya Nagaland nung mezüngbuba lir aser 2022 küm May ita Nagaland Chief Minister Neiphiu Rio-i semzükaka tang tashi ajakbo lapoka mali, ta ashi.

Subdivision nung aliba nüburtemi iba maongka agia yangi business tenzüksüla aser lanurtemi entrepreneurship nung tetsüng ajemoktsüla, aser nükla tajung akaba lanurtemi CM Microfinance amala bushitsüla, ta pai ashi.

Iba office tasenba anepalutsü atema jembidang, nisung ajaki iba centre ya pei jurila ama bilema kanga junga anepalua mürektsüla aser Naga nungeri mürekmejua aliba yimya süpatsüla, ta Advisor Zhaleo-i ashi.

Nüburtemi iba ama ki tajung wazüka ayutsüla aser tajung asoshi amshitsüla, ta ashi.

Lokti ajungba ajanga temelenshi adokdaksütsü,

anungji nüburtem temolung ulutsüla aser yimya tamajung, isms, tesempatep aser nükerem indoktsüla, ta pai ashi.

Aonsotsü ayoker aser anogoshi market lapoktsü asoshi iba ki compound nung ki tali asütsüla, ta ashi.

Iba sentong nung menden Imsongmeren, ADC Medziphema liasü aser pai iba ki indang rateta ashidang, ground floor ya business aser dokan tem atema lir, mezüng floor ya office aser danga establishment atema aser temaba floor ya hotel atema lir ta metetdaksü.

Iba ki amshitsü atema application kar arua lir aser mapang tatsüka tsüngta lemsatsütsü, ta pai ashi.

Iba sentong nung Solesul Thlore, Director & HOD, MAD, aser Miathou Krose, Advisor, CEB, NDPP nungeria jembia liasü.

Rev. Zhabu Terhüja, Pastor, BCAMT ajanga sentong tenzük sarasadem, telok kati ken ka aten aser Selemla, SDO (C) ajanga melepzüng o jembia liasü.

Iba sentong nung Medziphema Town nung aliba department balala nungi ketdangsurtem, GBs, CSO lenirtem aser yimtsüng balala nungi teshimtet lenirtem dena liasü.

Brisbane nung India consulate lapoktsü: PM Modi

Sydney, Monupii/May 23 (Agencies): Ato Kilonser Narendra Modi-i Mongolbarnü sentong ka nung shilem agiba mapang India-i Brisbane nung consulate ka lapoktsü ta shiogo, koba iba tesem nung aliba India nungertemi mapang talangka nungi khanga arudar.

Sydney kübok Qudos Bank Arena nung stadium ka nung o jembiba mapang Modi-i iba osang ya lemsatepa liasü. Iba sentong nung Australia Ato Kilonser Anthony Albanese-ia shilem agia liasü.

"Lokti senden ka nung Indian diaspora den sendakteptetba atema kanga pelar," ta Modi-i ashi.

Modi-isa, 'Little India' atema

nüngshilong sayatsüba mapang teyari agütsüba asoshi Australia PM dang kanga pelaba lemsatepa liasü. 'Little India' ya Sydney tezülen tesem tila ka lir.

Harris Park ya 'Little India' ta jatsütsü asoshi telemtetba agiba osang ya Modi pelashishia agizükba mapang Australia Ato Kilonser Albanese-i sangdonga liasü.

Harris Park ya Western Sydney nung hub ka lir, kong India nungertem Diwali aser Australia Day amala benjung balala amunger.

"Ni kü medemer Anthony dang kanga pelar," ta Modi-i iba sentong nung o jembiba mapang ashi.

"Ni New South Wales

premier, Parramatta yimti Mayor aser Deputy Mayor aser Councillors dang, kü nem aküm tetushi agütsüba atema kanga pelar," ta pai ashi.

Kasa mapang nung PM-isa Mongolbarnü science, artificial intelligence, social work aser art & music luyim nung Australia nung nungtugu nisungtem den sensaksemogo aser parnok dang India aser Australia na tesendaktep tajungba küma yanglushitsü atema teyari agütsütsü ajungshia liasü.

Modi Hombarnü Sydney tonga ao aser Bodhbarnü Australia Ato Kilonser Anthony Albanese den linük ana tesendaktep dak sendakba nung onük balala benoka sensak asemtsü.

'CM-i telangzüba agütsütsü': Sukhjinder Singh Randhawa

New Delhi, Monupii/May 23 (Agencies): Rajasthan chief minister Ashok Gehlot aser taoba deputy chief minister Sachin Pilot na mangatetep adoker aliba mapang Rajasthan Congress tekolakba Sukhjinder Singh Randhawa-i Mongolbarnü ashiba agi, Pilot-i Gehlot nem takhangba (ultimatum) ka agütsüba ya langzüksü atema Gehlot dak keta lir.

Randhawa-i, "Pai CM nem takhangba ka agütsüogo. Pai takhangba agütsüba ya CM-i langzütetsü. Congress party dak sendakba nungbo ni telangzüba agütsütsü," ta ashi.

Pilot den sensaksemba indang asüngdangba mapang Randhawa-i osangbenertem dang, "Rajasthan nung leniri ya tena (Ashok Gehlot-Sachin Pilot) dang masü. Tanga lenirtem aika lir. Ni parnok ajak den aser lokti balala lenirtem den sensaksemdar," ta ashi.

Pilot-i, iba ita tatem tashi nung pai takhangba agütsüba dak sendakba nung kecha jenjang magira pai state ajunga nung inyakyim ka benoka inyaksangshitsü ta shia Gehlot amokmerenogo.

Taoba BJP sorkar anema ochi mashi ken o dak sendakba nung Gehlot sorkari kecha jenjang magiba anema Pilot-i anogo ka lumia longkak aitiba sülen tenati aniba telok tsüngda tsükchitep tali kümogo. Iba sülen ano Pilot-i ano Ajmer nungi Jaipur tashi anogo pongu tsüngda kilometre 125 ayimjema 'Jan Sangharsh Yatra' sentong ayongzüka agi.

Pilot takhangbatem rongnung, Rajasthan Public Service Commission (RPSC) loksa yanglushitsüba, sorkar mapa atema tatidang paper leak asüba ken o nung akoksar alirtem nem temenok agütsütsüba, Vasundhara Raje-i aniba taoba BJP sorkar

anema benoka aliba ochi mashi ken o temaba jenjang nung bushisüngdangtsüba densema lir.

Randhawa-i Honibarnü, Congress-i mangatetep adoker alir shinga memintoktsü ta ashi ajisüiaka lenirtem party toktsür aoba sülen kechi tia-i ai iba indang metetdaksü. "Party-i shinga memintokner. Congress ya ajak akümtsüba party ka lir aser party nung mapang talangka sendaka alir shinga modaktsüner. Congress-i shinga memintok aser nenok ajaki Congress toktsür aoba lenirtem tia jenjang meteta lir," ta ashi.

OFFICE OF THE UNGER KOSASANGER PUTU MENDEN

(VILLAGE COUNCIL)
P.O.Chuchuyimlang. B.P.O. Unger -798614.
Dist : Mokokchung, Nagaland.

KONANG TETUSHI AGÜTSÜR

Ozü Kosasanger Putu tendak tsürabur tajung Lt. Osangtemba aser Lt. Meyipokla na jabaso **Wb.Imsongmeren**-i government tenzüka wadang nung jenjang temaba nung Deputy Commissioner menden tongtetba takok asoshi pa nem konang tetushi tulu agütsür aser nübör ajak den pelaba lemsateper.

Teyanglur Tsüngremi nübortem asoshi pa taküm aser mapa nung maneni azükarua moajangma.

Sd/-
(R. TALI IMSONG)
Charman,
Unger Village Council.



Sd/-
(OBANGLEMBA)
Secretary,
Unger Village Council.

OFFICE OF THE UNGER KOSASANGER PUTU MENDEN

(VILLAGE COUNCIL)
P.O.Chuchuyimlang. B.P.O. Unger -798614.
Dist : Mokokchung, Nagaland.

TENÜNGSANG AGÜTSÜR

Ozü Kosasanger Putu tendak tsürabur tajung Lt.Chubanungba aser Rongsenmongla na jala **Dr.Latongliila Jamir**-i Nagaland University kübok Environmental Science Department nung Associate Professor jenjang tajung ngutetba takok asoshi la nem tenüngsang tulu agütsür aser yimkong den pelaba lemsateper.

Teyanglur Tsüngremi nübortem asoshi la taküm aser mapa nung maneni azükarua moajangma.

Sd/-
(R. TALI IMSONG)
Charman,
Unger Village Council.



Sd/-
(OBANGLEMBA)
Secretary,
Unger Village Council.

Centre ordinance anema TMC-i nokdaktsü: Mamata

Kolkata, Monupii/May 23 (Agencies): West Bengal chief minister Mamata Banerjee-i Mongolbarnü, Centre-i Delhi sorka anema ordinance benokba anema Trinamool Congress-i nokdaktsü ta ashiba den opposition party tem dang longjemer inyaksü ajungshi.

Delhi chief minister Arvind Kejriwal aser Punjab CM Bhagwant Mann den Kolkata nung senden ka amenba sülen osangbenertem den sensaksemba mapang lai iba olen lemsatepa liasü.

"Iba sorkar ya "of the agency, by the agency and for the agency" sorkar ka kümogo.

Centre sorkari Constitution aser linük tenünga melentsü akok ta tsüba bilemer. Parnoki Supreme Court-i obendang agütsüba dena akümtsüba masür," ta Banerjee-i ashi.

Delhi nung service tem azüoktsü atema Centre-i ordinance ka benokba anema raratsü asoshi linük ajunga nung Kejriwal teyari meshia senzüba mapang iba senden menogo.

Kejriwal aser Mann na meina Aam Aadmi Party lenir Raghav Chadha aser Atishi Singh na oa liasü.

Senden nung National Capital Civil Service Authority ka amenoktsü asoshi Centre-i

ordinance ka benokba dak rangloker sensaksemogo. National Capital Civil Service Authority amenoktsü asoshi benokba ya taoba hopta Supreme Court-i, police, public order aser ali dak alaka service tem azüoktsü atema Delhi sorkar nem tashi agütsüba anema lir.

National Capital Civil Service Authority yagi IAS aser DANICS cadre ketdangsurtem transfer asüba achayangtsü aser parnok anema jenjang agitsü.

AAP-i, opposition party ajak dang teyari meshiogo aser ashiba agi, linük democracy aser Constitution kümzüka yunera longjemtsü mapang tongogo.

Bengal sorkari asürtem anepalua bener yoktsü tuyu

Kolkata, Monupii/May 23 (Agencies): West Bengal sorkari Mongolbarnü sangdong ka ajanga state nung aliba medical college aser mozüki ajak dang, asür kinungertem masüba yimya nung tsümangtem bener meyoktsüsa jenjang tapet agitsü tuyuogo.

Sorkar sangdong ajangasa, asür kinungertem tasügang bener aotsü asoshi facility shidak maliba ajanga parnok kinunger, adianutem indang tasügang kangshia apur aotsüsa akümba indang tetuteta ashi.

"Local body-i, takaratiba nung mortuary van ka mesüra tanga lenmang kar bushitsütsü aser mozüki ketdangsurtemi tasügang bener aotsü asoshi

jenjang tapet agiba sülenang tasügang bener yoktsüla," ta tetuyuba nung shia lir.

Asür kinungertemi facility shidak maliba ajanga tasügangtem kangshia bener aoba aiben atalokogo. Tawa nisung kati par ita pongu tain jabaso indang tasügang bag ka nung bener km 200 shi ao, kechiyong pai ambulance van atema taa magütsütsü liasü. Pai tasügang ya bener public bus ka nung senzüa liasü.

January ita-a Jalpaiguri district nung nisung kati pa tetsü tasügang tebu den yaritepa tapubang nung apuloker aoba video ka ayimsünga prokshia liasü. Iba tatalokba sülen opposition-i Mamata Banerjee-i

aniba sorkar kanga mejungi aija liasü.

Sorkar sangdong ajangsa, health facility tem aser local body tem angatetepa inyakra iba amala tatalokba nungi jenboa litetsü, ta ashi. Maneni sorkari, asür kinungertemi tasügang bener aotsü asoshi lenmang mebushitetra mortuary van mesüra tanga lenmang kar anepalutsütsü asoshi local body tem den tongtepratepa inyaksangshitsü asoshi mozükitem nem tetuyuba agütsüogo.

Tetuyuba nungsa, tasügang agütsüba aser tasügang bener aoba inyakyim ajak ya aküm tetushi agüja inyaksangshiteptsü nungdakba lemsatepergo.

DEBTS RECOVERY TRIBUNAL GUWAHATI
Suwarna Bhawan, House No.12, New Town Path,
Near Hanuman Mandir, G.S. Road, Ulubari, Guwahati - 781007 (Assam)

Case No.: OA/26/2023

Iba Act nung section 19 kübok sub-section (4) nung ajemdaker jaoker, Debt Recovery Tribunal (Procedure) Rules, 1993 rule 5 indang sub-rule (2A) den azüngtsü akok.

Exh. No.: 3244

HDFC BANK VS MESSERS SHIV SHAKTI HARDWARE

To,
(1) MR TOHOKHE Z AWOMI
SON OF SRI ZHEKLYE AWOMI RESIDENT OF PURANA BAZAR DIMAPUR NAGALAND PIN 797112
DIMAPUR, NAGALAND- 797112

JAOKER

15/05/2023 anogo nung Hon'ble Presiding Officer/Registrar matsüngdang OA/26/2023 list süogo.
Sentsüh Rs.4921837.18/- alanzüksü atema na anema benokba (OA) sülen iba Act nung section 19(4) kübok shia alima Application nung ajemdaker iba Tribunal-i jaoker. (application den documents densema lir).
Iba Act nung section 19 kübok sub-section (4) nung aliba ama na aser defendants dang teküboklen alibatem tuyur:- (i) iba case defend asürtemi tajaba agütsüba sülen anogo semer nü tsüngda relief asoshi meshibaji kechiba magütsütsüla, iba kuliji sayutsü metetdaksür; (ii) applicant-i original application nung serial number 3A kübok shia aliba kiojen aser osettsüset dak alia tanga kiojen aser osettsüset sangdongang; (iii) nai original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar; (iv) Security interest atema inyaksangshiba dak alaka nai Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla; (v) Ordinary business ajanga secured assets mesüra tanga assets aser kiojen nungi yokzüba senji security interest soita aliba bank mesüra financial institutions indang account nung deposit asütsüla.
Nü dang applicant nem tezüluba nung sangdong agütsütsü tuyur aser 08/06/2023 anogo nung anepdang 10:30 ako nung Registrar matsüngdang arutsü tuyur, yamaji meinyakra application ji angadangtsü aser na maliyonga telemtetba agitsü.
16/05/2023 anogo nung tsünglanglen kü meyongnem den iba Tribunal indang seal agütsür:

Sd/- Registrar,
Debts Recovery Tribunal
GUWAHATI



TIR YIMYIM YIMOBILEM (EDITORIAL)

DIMAPUR RASEMNÜ, MONUPII (MAY) 24, 2023

Mashikoshi inyakba mapatem

Anogo shia Nagaland nung atalokba mapa tajungtem indang züluner aser asen government sentong ajungba indang jembiner, ajisüaka mapang aser mapa agi memelar, kechiyong asenoki metetsümonga tajung dangbo majung teimba inyaker aser mapabo nübortem asoshi saka tajangzük angutsüsa masü, tenüng agitsü kija bilema inyaker ama mashikoshi inyakba agi temoatsü asütsüba mapatem agi timtem aser takoksa ajurutsüba mapa dang kümdaktsüba tensa tia aiben ajuruner. Item rongnungji tanüa Nagaland nung Mangkolemba aser Wakching nung state government-i college-bo lapok saka tesayurtembo meshim ta asüba timtem ajuruba ya ka asütsü. Ibaji Foothill lenmang nung apubo yanglua semzük saka lenmangbo meyanglu ta asüba amai lir. Aji oda, apu renemba amaji lenmanga renem atar apuji semzük asübo, tesemzük nü nungi iba apu aser iba lenmangji temoatsü kuma amshila. Ajisüaka, apu semzükba tenüng agitsü ariteper amato lenmang meyanglu ser apu semzük bajibo, ashiko, alima nung otsü tasen ka asütsüa akok. Aji tangsabo nungdak madoker. Ibaji mesüka tanüa college kiojen renemer tesayur meshimbaji, jungjunga bilemdangra, Naga nunger tanurtem nem sen meindoki parnok alidak kaketshisatsü tajung agütsütsüba nukjidong masü saka kiojen yanglutsüba contract mapa inyaksü asoshiang college lapok amai angatetter. Ashiko, college kiojen-jia shitakba drawing nung aliba ama yanglu asü, tilaba aser tatsüba yangluar tonga orr shitakba drawing yanglua akaba den medemdanga asadang nung dang metettsü. Atangji, college tasen lapoka aotsü atema kiojen renemer ano college tenzüksü mapang arudang tesayur aser inyakertem shitak shima metenzüktetra, ano küm ka agi menutsü, anungji küm kata amajok nung mesüidaktsü tekaratiba nung college tenzuka aotsübaji tim, iba jagi tesayur tasen meshim tsüngda khen atema tang teinyakdak tesayurtem college balala nungi atsüteta bener ao ta angatetter. Ajisüaka, college tasen ana tenzüksü mechi tang lapoka aliba government college-tem nung azüngertem akoksatsüsa tesayurtem shiteta bener aoba sentongji shitak masü. Kechi mapa aser sentong südirsüaka, mapa tasen ka tenzükba agi tejenbaji akoksatsüsa masü saka tasenba o tejenba na pronglaji tajungba asütsü toktepa inyaksüsa government kolok nung tangatetbaji alitsüla. Iba ama government nung alirtemi tashitemeteter yimsüsür aser ketdangser memesük, Nagaland nung college tasen lapokba agi college tejentem nung tesayur meperitsüsa inyakba ajanga nübortem rongnung tesünep aser temoatsü melen rongrong tendaktsüogo. Dimapur College nunga Science sayutsü atema kiojenbo renemogo, saka tesayur meshimer. Iba jagi tanurtem aika Science züngnüsüsa tazüngdak maka akoksadgi. Küm tenzükba aser amaba ya Nagaland nung ajungbena atalokba mapa ka masü mesüra linük den külemi kaketreju tenzükba aser atemba mapangtem ya ajungbena aruba mapang ka masü, anungji iba mapangji apir government-i kiojena renemtsüla aser tesayur aser inyakertema shimer atatsüla. Mapang talangka lir, kanga nungdakba tesem ana nung government college lapokbaji state government asoshi takok tuluka aser nübortem asoshia temoatsü tuluka. Ajisüaka, tesayur meshim aser mali ser college tanga nungi atsüdena college tasen ana tashi tenzüksü merangba agi, tesasatsüka, college tasentemji metenzükdangyongi raksaogo. Tangar government-ibo shiranga alirtem aneptsür saka asen government-ibo anema alirtem shirangdaktsür. Tanü ibaji asen Higher Education department nung ataloker. Ibai kangasa mashikoshi mapa lir. Iba yagi asenok peria makayonga tesünep nung alitsü melen nübortem süngjema melitetsüsa kümdaktsür. Aji oda, college tejentem nungi tesayurtem bener aobaji meyipa meyokra, atangji, kaketshirtemi odangbo meyutsüküm aser yimten nunga yimsüsürtem rongnung obang mapu adoktsü ana nung lir. Anungji, tensa tamajungba kuma maodang, perbo zükset saka ajokbo mesükdang ta asütsüsa, Higher Education nung yimsüsür aser ketdangsertemi yakta kaketshirtem aser tesayurtem jaoka sensaksem tenzüksüla.

OLEMSABANG NAGALAND JENJANG

- T. Lima Tzuwar, Ungma Aonglenden, Artang Ward

Oh Khristan lima asen Nagalandji Khristan lima aser Khristan asoshi ta noktaker aser ayimtener asen Aotsür aser Aortemi anir Naga nunger aser Nagatsür Naga nunger tanü koba jenjang nung lidar. Asen Naga nunger dang okra sowar ta jaa Assam nübör merijang 11 junga agi tamasa jilushi aibaji koda taaktsüka, iba den Naga nunger ken o jembiyongya arur aser kecha mekümteter, lia arudang ano Assam Governorba dangi Naga yimten atema senpet bener oa agütsübaji asen Naga nungertema tejak tenteter asü masü, bilemdangangma. Tangar bendangertemi asen Naga nungerji sowar okra ta repranga aliba ajanga tanü tashi kecha mekümteter. Oh Khristan lima temenen tera tulubaji asen meimchir mulungjang asünung aser mojing asen temulungjang nung mena alinungji Naga lima yanglushitsü aser melenshitsü jembia jembia tesüleni tang lujen lutaki. Taoba mapang R.C. Chiteni pa masüdang Naga nunger rong tzüyim telongi lutar ta ashiba tu ataloka arurati. Anungji iba teraksa lima ya shirnoki aser shibai yanglushitsütsü aser shibai metemshitsütsü. Anungji temeim amangbapur aser Nagaland nung aliba nütsüng nübör tajungtem, asenok temulungjang ya melenshi nungang asen lima ya ajungtsü aser melenshitsü asünung asen mulungjang nung tashioktsüba per nem asen Naga lima mashiokdaktsütsü asenok ajaki merangdi. Yangi Minister aser MLA tem dang ya shinür, nenok Minister aser MLA akümbaji nenok sasa aküm masü nübörtemi shimtet asünung nenoki, nübör aküm tsübutsüla aser tenzüksüla. Asen aliba lima ya govt. shingaia alizüka mali. Ali pokli nungi liyonga arudang oboula nunger mapang yim kümyonga arudanga ali mekazüka aser wazüktena aruyong yangji asenok ajak anisüngzüka liyonga arutaki. Asen Naga lima nung yim tilatiba ajak nung ali kiburtem lir aser idakji shingaia tebang aser teka aitsü makok asünung ULB masü town committee aküm nungang nübörtemi mulungtsü ama bilemer. Yamaji ka mesüra India sepay aser Nagaland nung aliba sepay dak temulung lemer election aginungbo rara tulu adoktsü aser nisung jenti taküm lalutsü aser ki o jen aser office aika mitsü akümstsü asünung akidang ama town committee election agitsüla. Ali aser ki tax agitsü temulungjang nung malitsüla aser bilema malitsüla. Shiyonga aruba ama asen Nagaland nung yimtsüng aser town kwi lir item ajak nung ali kiburtem lir, aser shingaia shinga nema ali aser ki nung tax magütsütsü, ken shidi sürbo ali melena magütsütsüa lehang lir.

Oh Khristan lima asen dangi kechi tia arutsüar asenoki memetet, asenok tang aliba amaibo melitetsü ama tensa kati menepa arur asünung ajaki tamanger taküm kaka ama bilema pei temulungjang tali melenshir alitsüba mapang lir. Taoba mapang aser tanü mapang nisunger inyaksangshi aser jembishinü kanga melenshiogo, aser akidang tamang aser tanü tamang na tetsüngta talangka lir. Taoba mapang nungbo asen Naga nunger tamang aser sarasadem nüktzü agi asen Naga lima kokogo, anungji ochi tamang aser nüktzü agi asen Khristan lima ya koktetsü asenok ajaki merangdi arungma ni.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sudan nung tekülem ki raksatsür, rakzükkraktem agi sünga lir



Khartoum, Monupii/May 23 (Agencies): Rara agi raksar aliba Sudan linük nung tensa mejungi aliba indang Khristan missionary kati lemsatepa liasü.

Pa takum kumzüksü mechi tenüng melener alisang Kafeel Amani-i rara aliba linük nung alirtem asoshi takumji kanga tetsübotsüka lir, ta ashi.

"Anisüngzük mali, kechiaser prangbong aser bomb apokba ola agi sünga lir. Nüburtem tetsübo aser teimla makai alir. Takum aliba tetetzü maka kechiaser nisung meimchir takum tazüngla kumogo."

Rara tesashiba akumba ajanga nüburtem Sudan yutsür ajener aser takum melitetsüsa akumer. Power, tzü aser chiyongsü samar.

Ibai Rapid Support Forces ta ajaba paramilitary force aser Sudan army tsüngta raraba tongpang ka lir, koba April 15 nü tenzük aser hopta trok ajunger.

Nüburtem tesem balala nung prokshiba, ki o jen raksatsüba aser tashiyim amshia shi nung medemba lir, saka senzüsempongsü gari maliba ajanga rara yutsür moteter," ta

Amami-i ashi.

Iba rara ajanga nisung meyirijang aika Sudan yutsür South Sudan, Chad, Egypt aser Ethiopia linüktem nung jenoker.

"Yimtong densema tesem ajaklen nisung tasümgang lir. Mozüki melapoker aser aika mitkartem amenoka alir," ta Amani-i ashi.

Tashiyim amshia rakzükkraktemba aser amakba tesemtem rongnung tekülem ki densema lir. Rapid Support Forces temi tekülem ki aser Khristanpur meyong ki o jen amaker.

Sudan nungi par kibong ainshitettsü asoshi sarasademjang ta Amani-i ashi aser yangji par adianutem lir aser kinungertem Kenya nung jenoka lir.

Timtem nung alirtem molung nung pai kongshitsü asoshi sarasademjang ta pai ashi.

"Tamangba yimsü mechi reshikangshi tia ajurur alirtem yaritsü asoshi ni maneni meranga inyaktsü atema sarasademjang. Iba ministry ajanga nisung aika takum melenshitsu aser kumzüksü atema sarasademjang," ta Amani-i ashi.

Alima nung Khristanpur alitsü asoshi tamajungtiba linüktem rongnung Sudan ya jenjang ter buba nung lir ta Open Doors indang 2023 World Watch List ajanga ashir. Iba linük nung tamanger nisung million ana dang lir, koba Sudan nütsüng yongsük shilem 4.3 lir.

Küm ishika iba linük nung tamangba yimsü temeden tsütsü teimla tajung liasü saka Khristanpur reshikangshiba maneni lir aser tang rara adoka aliba ajanga tamangertem asoshi tensa tamajungba akumtsü akok.

Islam yimsü kanga metsünga-reta amanger shirnoki military sorkar aginer, parnok aser April 2019 nung Omar al-Bashir yimla laodaktsür tsüngta tashi agi raktepa tensa mejungi akum, ta Open Doors ajanga ashi.

Al-Bashir atsüngdokba ajanga transitional sorkar ka tentet, kong mitkar aser civilian lenirtem tsüngta tashi lemsar yimsü asü.

Saka Islam yimsü yutsüba asoshi tasüba temerenshi agütsüba ozüng 2020 küm samadaktsüba tanaben meyipa shilangtsü akok ta tsüboteper.

ANOGO ABEN TSÜNGREM DEN

Telangzüba ka asütsü renemang (T.ken 105: 16-23)

Sarasadem telangzüba ka angutsüji koda tesümgangtsü. Saka iba dang nungi tesümgangtsü tulubaji- sarasadem nung telangzüba asütsübaji lir. Nai sarasadem ka telangzüba menur angu asü? Yosefi menur angu. Tekong 17 nung azünger, "Pai parnok jakdang nisung ka: Yosef kilir asütsü yoka liasü." Iba mapang Tsüngremi kechi inyaker

Yosefi mungui liasü. Saka pa ji sarasadem telangzüba ka asütsü Tsüngremi renema liasü. Israel nübur kumzüksü Yosef amshitsü Pai renema liasü. Yosefi aji meinyak asübo, kinji samar lila. Kinji samara asübo, asenok Laishiba makai lila, aser asenok Kümtekdakba ka magizüki lila.

Tsüngremi Pa sentong asameyanger. Kechi ataloker asenok shisabulutsü mali, kechiaser Tsüngremi metet. Pai teti tanüker ayur, aser Pai kodanga mesümganger. "Ibaji koda atalok?" ta Tsüngremi kodanga mashir. Alima nung nükjitung tulu atalokdaktsütsü asoshi Pai Abraham, Isak aser Yakob aser Yakob chirtem shimtet. Yosefi mapa inyak aser tamang agi jaja. Pai tetendangba aser mezümgameshi ajanga ao, saka tatem nung takok angu. Tatitangba nungi takok, talenba nungi temoatsü, sarasadem telangzüba Yosef liasü.

Tanü nai süngmangya alitsü. Kechiba ni iba timtem ajanga aor? Kechiba Tsüngremi kü taküm tepela taküm ka mekümdaktsür? Yosef bilemtetang. Tsüngremi pa shimtet, sarasadem telangzüba asütsü pa renemtsü.

Tsüngremi ne tatitangtem mekümdaktsür. Pai itemji na ajungtsü aser Pa sentsüwangshi asoshi yanglu. Tanü na tatitang aser timtem ajanga aor. Tsüngremi na asoshi kechi renema lir ibaji asoshi na renemdakjang. Sarasadem telangzüba ka na asütsü Pai sentong yanglua alitsü akok.

Pakistan nung Khristan lanur ana blasphemy ken o nung tai tongloktsü

Lahore, Monupii/May 23 (Agencies): Brehostibar (May 18) nikongdang Babar Sandhu Masih ya süngo jemer anisüngzüka alidang Lahore, Pakistan kübok Qurban Lines kiyong nung par kima nisung asatepba ola pai angashi.

Masih ya kimai alunung par kidanger police, Zahid Sohail-i par jabaso aser ano tamanger teburchanu ka dak züka liasü. Par jabaso arishi küm 18 tain Adil aser anasa alir arishi küm 14 tain Simon Nadeem Masih na asayatepba mapang parnokki tamangba yimsü mezümgameshi ta Sohail-i tai tongloktsü, ta pai ashi.

"Teburchanu ana ya ajanga aodang tenati prophet Muhammad mezümgameshiba angashi aser iba sülen menütep ta Sohail-i mezüngbo ashi. Pai Simon dak azük tenzük aser Adil-i pa kumzüksü merandang Sohail-i pa daka azük," ta Sandhu Masih-i ashi.

Masih ya Catholic lir aser gari yangluba tesem ka nung gari sentsü mezütsür ka lir aser pai ashiba agi, kiyongertem kera adenshi aser Sohail-i nenshia tai tongloktsü.

Sohail-i tai tongloktsüba tebur anaprongi magizük aser Muslim prophet tenüng

khenyongi metetshi ta tenati ashi, ta Masih-i Morning Star News dang ashi.

"Kiyong nung tain temi Sohail dang pai tai tongloktsüba busema kuli agütsütsü asüngdang saka pai parnok temolung süa meshiteti yutsür ao."

Tanur pezü rongnung Adil ya tanubosang lir aser Race Course police station nungi officer temi nikongdang par ki mita bushi aser Adil ya apu. Parnoki Simon ya apu aser Sohail-i tena tenüng nung tamangba yimsü mezümgameshiba atema ken o ka benoka lir ta ashi.

"First Information Report (FIR) nung shia aliba ngua onok aoksa, kong Simon-i 'puppy Muhammad Ali' ta aja aser tenaprongi iba atema asayamenü asü ta Sohail-i tai tonglokja liasü," ta Masih-i ashi.

Tena ya Pakistan indang blasphemy statutes indang Section 295-C kübok Muhammad mezümgameshi ta aitsü, aser iba ozüng nung aibelener nem tasüba temerenshi agütsür. Pakistan nung Muhammad Ali ya kanga bulua jembiba tenüng ka lir, kong mezüngbuba tenüng ya Islam tesayur indang aser tenüng

tatembangba ya Hazrat Ali indang lir, shiba Muhammad'er jala kinungbo aser caliph pezütsüba lir.

Taitsüba ya tamendak dak maka, kechiaser Sohail-i iba ken o mezüngbenokdang puppy (azü chanu) indang mejembi, ta Masih-i ashi.

"Onok kiyong nung shinga kidanga azü mali aser iba tatalokba tesem nung azü chanu meliasü. Sohail-i tiazü nung ozü tanurtem anema ken o benok," ta Sohail-i ashi.

Masih-i ashiba agi pa kinungtsü ya temolungjang tashidak lir aser anaben stroke süogo.

"Iba ama ken o tamajung nung Adil pua lir ta lai memetet aser la dang ni iba osang mashi kobika alitsüar ni memetet. La aoksatsü," ta pai Brehostibarnü (May 18) ashi.

Küm ishika tejakdang Adil ya school yutsü aser pa den külemi car painter akumtsü training agia liasü, ta pai ashi.

"Ni Hokulbarnü (May 19) Adil khen ajurutet aser iba mapang police temi pa court-i anir arua liasü. Tanur anaprongi taoksa aser tetsübo-tatentet tia nung lir aser Sohail-i parok pudaktsüba mangateter," ta Masih-i Morning Star News

dang ashi.

Qurban Line kiyong nung Khristan kibong 500 shi alir aser küm aika yangji tamangba yimsü dak sendakba mangatetep meliasü, ta pai ashi.

"Onok aliba tesem nung Sohail-i mapa tajung inyakba mali, anungji yangi alir shingai pai tai tongloktsüba süoki ia magizüker. Kidanger Muslim nungeri onok küm aika nungi meteta lir aser parnok tamangba yimsü tsütsü temolung yirutsüsa onoki kodanga kecha meinyaker ta parnokki meteta lir," ta Masih-i ashi.

Adil aser Simon mapudang police temi ken o kanga junga asadangla asü, ta pai ashi.

Pakistan Center for Law and Justice nungi Napolean Qayyum-i ashiba agi, parnokki kibong ana indang tanurtem asoshi teyari lenmangtem bushitsür.

"Ken o benoker temi FIR agütsüba ya tebilemba tamajung nung lir, saka police temi kanga arrsanga tanur ana ya apu. Tena tekeraba nung bail nung chioktsü onok teimla lir," ta pai ashi.

Pakistan nung tamangba (Islam) yimsü mezümgameshi ta tiazü nung tai tonglokja nisung

aika züksetogo.

Pakistan nung January 1 aser May 10 tsüngta tamangba yimsü mezümgameshiba ken o 57 shi lir aser tamangba yimsü mezümgameshi ta temolung meleme alir nisung pezü kasa mapang züksetogo mesüra tepsetogo, ta Lahore nung aliba Center for Social Justice and People's Commission for Minorities Rights (PCMR) ajanga ashir.

Iba ama tatalokba January ita ti liasü aser February ita 17 liasü, March ita tenet, April ita 19 aser May 10 tashinung trok liasü, kong nisung 57 dak tai tonglokja lir.

Tamangba yimsü mezümgameshiba ken o timtiba Punjab Province nung lir (28), aser iba sülen Sindh Province nung 16, Khyber Pakhtunkhwa nung ti, Azad Jammu and Kashmir nung pongu lir.

Iba atema retired Justice Nasira Javaid Iqbal, patron-in-chief of PCMR ajanga sorkar dang ozüng tesashi tim masüba nung mamshitsü ajungshia liasü.

Open Doors ajanga alima nung Khristanpur alitsü asoshi tamajungtiba linük 50 asadangba 2023 World Watch List nung Pakistan ya jenjang tenet buba nung lir.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Rabang

(v) tenük aser temulungjang sübanga ayu (blur)

* Tenük aser temulungjang tashi mait akümdang **rabanga** ayur.**Radang**

(v) lemdang, sedang (divide)

* Alu tila ka agi ozü küna **radanga** ayim.**OLONG PAITEP # 6524**

	1		2			3		4		5
6								7		
					8		9			
			10							
11										
				12						
13		14		15						16
17										18

TIPIEN

1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S _ _ _ _ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. _ _ _ hi - (3)
16. Akümüli nungi pilar - (3)

OLONG PAITEP # 6523 TELANGZÜBA**TIPIEN :**

1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kiooktsü,
5. Lenti, 7. Tajangzük,
11. teronem, 12. Sempa,
13. Jahaz.

**WARAKLA O ALOKBA NA BALATSÜ****ATEMA COURT NUNG :**

Obandanger : Nüna pronglai pei temeten shiogo, sürapangla tanur ka ya koma süner, shibai mesütsü?

Warakla : Ayaaa tamarener, iba tanur ya niang ita tuku kübok nung benerang tila asü dang nungi tain küma kü mama agi mesü tetba, kudasür pa agitsüba? Ni agitsü ati.

Obandanger : Mr.Alokbai kechi ashir?

Alokba : Tamarener, ni tatishitsü ka dang shidi...

Na ATM-i oagi ATM card ji machine nung jouktsür külen tenemshitsü shitak nemshir bo sen nai aginüba alur südi? Iba sen to ATM machine agitsü asü na agitsü?

Obandanger : Oh angatetogo, angatetogo!

~Lilir : WhatsApp

TERNEMJEM TSÜRABUR

Na iba akümüli nungi pilar küm renteta arudang onok kanga rongjesenta ala ashir. Tensa mapang ajak nung nü sensaksem ola onok narongi arudang onok nüla küm kümshir.

Nü akhümdong milen tesangwa agi onok teti len aniangma. Amen.

~ Teti mamatetba nü temeim,
Chirnur, Semchirseemnur & Kinungertem.

**AYPC-i nisung 36 UAPA kübok pua aliba chioktsü akhanger**

Itanagar, May 23, 2023

(Agencies): Arunachal Pradesh nung tawa state ajunga ghonda 72 mokdangdang nisung 36 tashi Arunachal Pradesh Unlawful Activity Prevention Act (APUAPA), 2014 kübok tai tonglokja apuba chiokang ta Arunachal Pradesh Youth Congress (APYC)-i takhangba agütsüogo.

State sorkari anogo pungu tsüngda nisung 36 mechiokra ozüngi melaba ama lungkak aittsü ta Congress indang youth wing-i ashi.

APYC-i State Home Minister Bamang Felix dangi züluba shidi ka nung Arunachal Pradesh Public Service Commission (APPSC) paper temai adokba dena onük aika lemsatepa lir.

Ghonda 72 mokdangba mapang tashiyim agi social

activists aser lungkak aiterem apuba ajanga state tensa mejungi kümä lir ta APYC-i ashi.

Pan Arunachal Joint Steering Committee (PAJSC)-i 13-point charter of demands agütsüba Chief Minister Pema Khandu-i February 18, 2023 nü inyaktüsü nangzük saka meinyakba anema lungkak aitdang nisungtem apu, ta parnokisa shia lir.

State sorkari mapang shitak nung APPSC paper temai adokba ken o bushisüngdang masüba ajanga activists-i mapa tulu inyaktüsü akümer, ta APYC-isa ashi.

Sorkari ochimashi ketdangsurtem shimba ajanga public-i tebilemsü abener, ta parnokisa shisem.

"Nisung 36 apuba parok anema APUAPA kübok ken o 12 benokba ya tim masü kechiyong

parnok magisterial remand nung lir. Ano parnok anogo 12 ayutsü aliba nungi anogo 30 akümba ya meimchir temeten alema lir kechiyong parnok ya ozüng alema inyakterem masü saka activist tem lir. Parnoki ochimashi inyakyim anema noktaker aser Constitution indang Arrla 16(1) nung lateta aliba ama kija nisungtem temeten kümzüka ayutsü meranger" ta APYC-isa shidi nung metetdaksüogo.

Sorkari ochimashi anema inyakba nung tepuokdak yua aliba nisungtemia yariteper, ta APYC President Tarh Jonny-i ashi.

APYC-isa Home Minister dang anogo pungu tsüngda nisung 36 tatemzükba kecha melii chioktsü takhangba agütsüogo.

GOVERNMENT OF NAGALAND**DIRECTORATE OF A.H. & VETERINARY SERVICES
NAGALAND::KOHIMA**

NO. VET / PLAN-NLM(GEN)/5/2020-21/

/Dated Kohima, the May 2023

ADVERTISEMENT

Want to become a successful entrepreneur?

Do you have the capability to become a producer?

Want to become a supplier!

Do you want to export your product?

Become a CEO of your own company.

Here it is, the Department of Animal Husbandry & Veterinary Services is inviting educated, hardworking, dedicated and capable entrepreneurs from Nagaland for availing the newly Centrally Sponsored Scheme launched by Govt. of India called "Entrepreneurship Development Programme".

The programme shall support Goatery, Sheep & Piggery farming including Silage making unit, Fodder block making unit and Feed mixed ration plant through credit linkage with the following ceiling limit:-

Sl. No.	Unit size	Total amount	Capital subsidy
A	Goat / Sheep Farm		
1	100 Females + 5 Males	20 lakhs	10 lakhs
2	200 Females + 10 Males	40 lakhs	20 lakhs
3	300 Females + 15 Males	60 lakhs	30 lakhs
4	400 Females + 20 Males	80 lakhs	40 lakhs
5	500 Females + 25 Males	100 lakhs	50 lakhs
B	Piggery Farm		
1	50 Sows + 5 Boars	30 lakhs	15 lakhs
2	100 Sows + 10 Boars	60 lakhs	30 lakhs
C	Feed & Fodder		
1	Silage making unit, Fodder block making unit, Feed mixed ration plant	100 lakhs	50 lakhs
D	Rural Poultry Entrepreneurship Model of 1000 birds of Low Input Technology	50 lakhs	25 lakhs

Individual, FPOs, JLGs, SHGs and section 8 companies can avail the project. Interested Entrepreneurs can apply through the online portal www.nlm.udyamimitra.in.

The EOI through this advertisement having a validity of 45 days is issued with no commitment and the State Implementing Agency reserves the right to disqualify any applicant at any stage if prescribe criteria are not fulfilled. For further information, the Department can be contacted through Mobile No. 9362793764 & 8415949990 during office working hours.

(DR. NSANTHUNG EZUNG)

Director

AH & Veterinary Services
Nagaland, Kohima

Brazil nung animal health emergency sangdong



Brasilia, Monupii/May 23 (Agencies): Arem nung aliba ozü dak avian flu putetba sülen Brazil nung ita trok animal health emergency sangdongogo.

Espirito Santo state nung cases tenet putet aser Rio de Janeiro state nunga ka puteta liasü.

Iba emergency sangdong ya ajanga sorkari kanga kera menatepa aoba H5N1 virus prokshia aoba nungi nokdangtsü mera agitsü temelaba kumdaktsür.

Alima nung an shi bendang

lima dang timtiba ayokbaji Brazil ya lir, kong küm nung sen billion \$10 jungnüa indang ayoker.

Ketdangtsür temi ashiba agi iba tashidak ya Brazil south nung an shi ayokba tesem tongtiba nungi meta talang pilar ngutet.

Farm nung iba tashidak putetba ajanga aiben ozü/an aika tepsettsüsa akumer aser mapang ka-ka danga linük nungi aliba nunga tenokdangba agütsür.

Jelia mera agiba ama linük tesem ajunga nung health emergency ya anogo 180 atema

sangdonga lir.

Alima nung October 2021 sülen bird flu tashidak tamajungtiba pokteta lir aser arem ozütem tang asüba ama taoba mapang mongudang. Mamatzü agütsüba shirurua kar iba tashidak menar.

Scientist temi tang tashi iba tashidak pokteta ya danga dang nungi kechiba tamajungbar mejangjateter saka shiruru takum nung kanga sashia kongshitsü ta World Organisation for Animal Health (WOAH) ajanga ashir.

H5N1 virus tali prokshia aoba kanga junga reprangtsüla aser nisungtem rongnunga menashia aotsüsa yimya melenshiba kanga junga reprangtsüla, ta World Health Organization ajanga ashir.

Iba virus aliba ozü anasai aoba ajanga nisung dak iba tashidak adokba lir.

Menungra Bilemteter



Temeim ojala **Kilemla (1930-24-05-22)** ex. tesayula Longchem town akümüli toktsür tanü küm ka abensa dang nü senti, shisa o tajung tem maneni bilemteter, küm nungi küm ta masü, saka na teti onuk den asangsang nung ali ama menungrar. Nur putu mapang ajaki "HAUNI" ta sotetdaksüba asoshi Tsüngrem tenüng maneni sanga iba anogo bilemteter.

"Kechiaser David-i pei putu nung Tsüngrem tasazükba tenzüker külen,pa-a pei tetsü-teboutem den ayu aser shizüka ao. (Tenyartem mapa - 13:36)

~ Temeim kinüngbo, chinur, semchirtem, anük- apang, molung ajemerterem.

OFFICE OF THE LONGCHAR KIDONG KOHIMA : NAGALAND METETDAKTSÜR

Kohima nung alir Longchar Kidong 27th May, 2023 nung Tsungba Talitsübar'er kidang General meeting anepdang 10:00 AM nungi alitsü, anungji Süngpu Zünga nungi tema ajak arua senden nung atentsü metetdaksür.

Tesentepdak : High School Junction nungi Secretariat lenmangi meter ishika orr achijilen lenmangi ayaketa atuba nung lir.

Sd/- **IMTIMAR LONGCHAR** President, Longchar Kidong, Kohima. Sd/- **TOSHIMENBA LONGCHAR** Secretary, Longchar Kidong, Kohima.

DIMAPUR MISSION HR. SEC. SCHOOL

Churches Colony, Near City Tower, Dimapur - 797112, Nagaland. Website: WWW.dimapurmissionhrsecschool.com

ADMISSION FOR CLASS-XI (Arts) Boys & Girls

Direct admission will be given according to the first come first serve basis. Admission begins from 25th May 2023.

Our Special Features:

- ❖ Well-trained, competent and experienced subject teachers.
- ❖ Library & Generator facilities.
- ❖ Counseling and retreat programme
- ❖ Special Remedial classes.
- ❖ Hostel and Bus service facilities.
- ❖ Consistent Good results.

GOVERNMENT OF NAGALAND

DIRECTORATE OF HEALTH & FAMILY WELFARE

NAGALAND: KOHIMA

No.DHFW-5/D.Pharm/Part-II/2014

Dated, Kohima the *th* May'2023

NOTIFICATION

With reference to the Letter No.2023/AMC/IP/313/Date: 25/04/2023, the following Candidates are selected on 23rd May'2023 to undergo Diploma in Pharmacy (D.Pharm) course at Institute of Pharmacy, Assam Medical College, Dibrugarh for the Academic session 2023. The following Candidates are provisionally selected through Academic Merit Marks.

Acceptance Letter may be submitted to the Office within 5 days from the date of issue of the Notification. Waiting List will be maintained for a period of 3 (Three) months w.e.f the date of issue of this result.

Selected List

1. NgonjaiKonyak
2. NepeToisha B
3. LeyaInshe P Konyak
4. NahchongJassePhom H
5. Mongpure Y Chang

Waiting List

1. Lhiweto-ü Mero
2. Himpao P
3. KeduosieliePienyü
4. Lewe-ü Dienu
5. Sezuwe Khalo

(DR. VIBEITUONUO M. SACHU)
Principal Director,
Directorate of Health & Family Welfare,
Nagaland: Kohima.

CHRISTIAN HIGHER SECONDARY SCHOOL

NYAMO LOTHAR ROAD, DIMAPUR - 797112, NAGALAND

E-mail: christian.dimapur@gmail.com

Website: www.chssdimapur.com



We design your child's future We build your child's career

IN LOVE AND TRUTH WE STRIVE

ADMISSION FORMS FOR CLASS 11 ARTS & COMMERCE 2023 AVAILABLE

- **Direct admission** for 'meritorious' students starts on **25th May, 2023** on first come first basis.
- **Last date for form submission: 30th May, 2023** for those requiring entrance exam.

Senior men's Inter-district tournament asayamung osang

Dimapur, Monupii/May 23 (TYO): Tang asaya aliba Senior men's Inter-district tournament nung Mongolbarnü Nagaland Cricket Stadium nung mezüngbuba asaya Mokochung aser Niuland na asaya liasü.

Toss akokba sülen Mokochung team-i mezüng bat amentsü shim ajisüaka parnoki over 25 nung asayar ajak out ser run 97 dang yanglutet. Parnok rongnungi Champo (run 27) aser Nripen Rai (run 11) nati dang tera junga asaya.

Niuland bowler tem rongnungi Akavi A Yeptho-i over 6 nung wicket 4 agi aser pa nem man of the match naroküm agütsü. Bowler tem rongnungi ano Sunil Sharma-i wicket 3 aser Hokaito, Jalal aser Vino G Zhimomi nungeri wicket kaka agi.

Run arishiba mapang Niuland team opener Afzal Hussain-i run 21 aser Vishal Sahani-i run 29 yanglua team jenjang kanga junga yanglutsü aser parnoki iba asaya over 18.1 nung wicket 6 agi koka liasü. Mokochung team atema Vijay Rai-i wicket 2 aser Longsasunep o Nihal Rai nati wicket kaka agi.

NCS nung tangbuba asaya Mon aser Longleng na asaya koba Longleng-i wicket 4 agi koka liasü.

Mezüng bat amenba sülen Mon team-i over 27.2 nung run 131 yanglua liasü. Mon team nungi top order batsmen 4 kanga kara out süatok ajisüaka Ahon Konyak-i run 52 yanglua par

team nem teyari agütsü. Shamwang Wangnao aser L. Manchen Konyak natia run 19 aser 10 yanglua liasü.

Longleng atema Arjun Kumar Yadav aser Moakumzuk nati wicket asemsem agi aser Mungkham-i wicket 2 aser Bidesi Nayak o Shingpang nati kaka agi.

Asaya akoktsü atema run 132 nungdak asayaba mapang Longleng team-i kanga junga asaya tenzük aser Moakumzuk-i run 32, Watimeren-i run 22 yanglu. Ajisüaka Arjun Kumar Yadav-i out meüsi run 26 yangluba ajanga Longleng team-i wicket 4 agi asaya akokba nung teyari tulu agüja liasü. Mon atema Renthungo aser Pangnyi P nati wicket anana agi aser Phaknyu Konyak o Nanwang Konyak nati kaka agi.

Man of the Match naroküm ya Arjun Kumar Yadav nem agütsü, shibai run 26 yanglu aser wicket 3 agi liasü.

Sovima Cricket Ground nung mezüngbuba asaya Phek aser Kiphire na asaya. Toss akokba sülen Phek tama batting amen aser parnoki over 29 nung run 134 yanglua liasü. Parnok rongnungi John Thevury aser Kotso Mero nati run 14 aser 27 yanglu aser Muzita Nienu o Lawrence Vero natia run 11 aser 29 yanglua liasü. Kiphire atema Bohoto Yeptho-i wicket 3, Sonu Chand aser Upender Rai nati anana aser Ajay Dey o Yangli Y Sangtam nati wicket kaka agi.

Run arishiba mapang Kiphire atema captain Bohoto Yeptho-i kanga junga asaya run

32 yanglu aser opener Avishek KR Singh-ia run 62 yanglua liasü. Maneni Upender Singh-i out mesüi run 35 yanglua parnoki asaya wicket 7 agi koka liasü.

Asaya nung Man of the match naroküm Bohoto Yeptho nem agütsü.

Maneni SCG nung tanabuba asaya nung Tuengsang-i run 3 agi Peren koka liasü. Mezüng bat amenba sülen Tuensang team-i over 30 nung wicket 8 out ser run 152 yanglua liasü. Parnok rongnungi Rajesh Das-i run 54, Royimkiu-i run 36, Baharul Islam-i run 20 aser Imlong-i run 14 yanglua liasü. Peren atema Poiring-i wicket 3, Ujwal Rai-i 2 aser Mughavi Wotsa o Bamyibe Npanme nati wicket kaka agia liasü.


Run arishiba mapang Peren nungi asayar Ujwal Rai-i run 57, Parbez Alom-i run 38 aser Bamyibe Npanme-i run 10 yanglua kanga meranga asayadang ajisüaka run 3 agi memenepi asaya makok, kechiyong over 22 buba nung parnok ajak out süadok.

Tuengsang bowler tem rongnungi Baharul Islam aser Royimkiu nati wicket pezüzü agi aser Chily Sangtam-i wicket 2 agia liasü. Iba asaya atema Man of the match naroküm Royimkiu nem agütsü.

Bodhbarnü asaya:

Nagaland Cricket Stadium
8:00 ako : Zunheboto vs Tsemenyu
12:30 ako: Mokochung vs Phek
Sovima Cricket Ground
8:00 ako : Kohima vs Mon.

Neeraj Chopra world number 1 asayar kumogo



Monupii/May 23, 2023 (Agencies): Hombarnü sayaba ranking nung Neeraj Chopra, tebur javelin throw asayartem rongnung world number 1 asayar kumogo.

2020 Tokyo Olympics nung Neeraj ya India nunger rongnungi track and field event nung mezüngbuba Olympic gold medalist aküm aser ibaji dang masü pa India nunger rongnungi track and field nung world no. 1 akümiba mezüngbuba asayar lir.

Neeraj-i, Grenada nunger world championship tesüsabuba koker alisang Anderson Peters ajateta temaba jenjang tongtetogo.

Taoba küm September ita Neeraj Chopra-i Zurich nung Diamond League 2022 finals akok aser pa India nunger rongnungi iba tetushi takok marok anguba mezüngbuba asayar aküm.

Arishi küm 25 tain Chopra-i, 2023 kuma Doha nung Diamond League series mezüngbuba leg nung gold medal nguogo. Taküm mezüngbuba asayamung nung shilem agiba mapang nület mezüngbuba atsüba mapang pai meter 88.67 tsüteta, pai tang tashi nung tajungtiba tsüteter aliba aser national javelin record koba meter 89.94 lir iba ya tera agi dang metongi liasü.

Neeraj, Netherlands kübok Hengelo nung June 4 nü nungi tenzükba asayatsü aliba Fanny Blankers-Koen Games nung shilem agitsü renemdar aser iba sülen pa Finland kübok Turku nung June 13 nü nungi tenzükba Paaivo Nurmi Games nung shilem agitsü.

Season tenzükba mapang Neeraj den sensaksemdang pa 2024 Paris Olympics dak rangloker inyaksangshidar ta ashi.

Vinicus nem red card agütsüba sülen VAR ketdangsür 6 mapa nungi anentsüogo



Monupii/May 23, 2023 (Agencies): May 21 nü La Liga nung Real Madrid aser Valencia na asayaba mapang fan temi Vinicius Jr mezüngmeshia jembiba sülen Royal Spanish Football Federation aser Referees Technical Committee-i VAR referee 6 mapa nungi anentsüogo.

Mestalla Stadium nung asayaba mapang Vinicius ya Valencia fan tem den asatepba nguogo, shirnoki pa dang "monkey" ja liasü.

Iba sülen asaya tatemtsü lia Valencia striker Hugo Duro den asatepba atema Vinicius nem indang indanga red card agütsü

aser iba ajanga ano tensa tamajungba kümdaktsü. Duro den asatepba mapang Vinicius-i pa dak maoktsüba nguogo.

Marca sangdong ka ajanga ashiba agi, Vinicius nem red card agütsüba tatalokba ya asdangshiogo aser kuli kar ngutetba sülen La Liga indang VAR ketdangsür 6 mapa nungi anentsüogo. Ketdangsürtem mapa nungi anentsüba indang rasa ashiba mapang, iba sangdong ajanga ashiba agi, iba asaya atema VAR tekolakba Iglesias Villanueva-i, on-field referee De Burgos Bengoechea nem noksatem mabensai agütsüba nguteta liasü

aser iba ajanga Vinicus nem red card agütsü.

The Royal Spanish Football Federation aser Technical Committee of Referees-i, clip tabensa masü saka Vinicius'-i Duro dak maoktsüba indang clip dang kechiba sayu iba indang kuli monguteti lir.

Osang ajanga ashiba agi, iba season nung Vinicius Jr terben tashi fan temi mezüngmeshia liasü. Pai pa tebilemba Instagram ajanga lemsatepba mapang, league ketdangsürtem aser fan tem aija liasü.

Paisa Twitter ajanga, "iba championship ya mapang ka nungbo Ronaldinho, Ronaldo, Cristiano aser Messi nunger amala nungtugu asayartem meyong liasü saka tangbo racists tem meyong lir," ta ashi.

Iba asaya goal 1-0 agi makokba sülen Real Madrid coach Carlo Ancelotti-ia La Liga aitsüogo aser iba league nung inyakyim meshidak kar lir koba nokdangtsü nungdaker ta ashi.

Küm 20 sülen Newcastle pur CL atema qualify süogo

Monupii/May 23, 2023 (Agencies): Küm 20 sülen tang mezüngbuba Newcastle pur Champions League atema qualify süogo. Hombarnü Leicester den goal kaka danga magütsütet asaya tembangba sülen parnok qualify süogo.

Pongububa nung aliba Liverpool team, Honibarnü Aston Villa den draw asüba sülen Newcastle pur tanungba asaya ana nung Champions League atema qualify asütsü asoshi point ka dang nungdaka liasü.

Eddie Howe-i aniba team-i iba nukjidong ya mezüngbuba merandangba mapang tongtetogo.

Newcastle team ya Premier League nung relegate asütsü nungi jenboa asaya aruba team ka liasü saka ita 18 tsüngda parnoki top four tongteta asayaogo, iba ya Howe lenisüba aser club kiburi senotsü peria

intokba ajanga lir.

Maneni 1999 küm sülen iba season nung parnok tang mezüngbuba domestic final ka tonga asaya ajisüaka League Cup final nung parnoki Manchester United makok.

Bobby Robson lenisüba nung Newcastle pur Champions League atema qualify süa asayaba sülen küm 20 lir tang mezüngbuba CL atema qualify süogo.

Kasa mapang nung tamamangtsüka Premier League akokba sülen küm tenet dang lir Leicester pur tang relegate asütsü ana nung lir. Club puti otsü nung parnok 12 ben tashi relegate süa lir.

Dean Smith-i aniba team yagi taoba league asaya 15 nungi saya ka dang koka lir aser parnok ponglang len nungi züngyonga atu nung tasembuba nung lir.

BILEMDANGANG

"I ta atongtsü atema alizüng yuang. Nai aji matongyonga petinu kabo atongtsü akok."